

共同經課 - 1

創世記二十四章三十四節~三十八節, 四十二節~四十九節, 五十八節~六十七節

34 伊就講：「我是亞伯拉罕的奴僕。35 耶和華大大賜福佇我的主人，互伊興旺，閣互伊羊、牛、銀、金、奴僕、女婢、駱駝，及驢。36 我的主人的某撒拉年老的時給我的主人生一個子；我的主人亦將一切所有的互此個子。37 我的主人教我咒誓講：『我倚起迦南人的地，你唔通給我的子娶in的查某子做某。38 你著去我的老父的家、我本族遐，給我的子娶一個某。』42 「今仔日我到井邊，講：『我的主人亞伯拉罕的上帝——耶和華啊，你若互我所行的路順事。43 我今倚佇水井邊，對一個出來汲水的查某囡仔講：請你將你瓶裡的水淡薄互我飲；44 伊若講：做你飲，我亦欲給你的駱駝汲水；願彼個查某囡仔做耶和華所定著互我的主人的子做某者。』45 我心內的話猶講未了，利百加就出來，肩頭頂背水瓶，落去井邊汲水。我就給伊講：『請你互我飲。』46 伊就趕緊對肩頭頂放落水瓶，講：『請飲！我亦互你的駱駝飲。』我就飲；伊亦互我的駱駝飲。47 我閣問伊講：『你是是誰的查某子？』伊應講：『我是密迦對拿福所生的子彼土利的查某子。』我就將環掛佇伊的鼻，手環掛佇伊的手。48 我就俯頭拜耶和華，謳佬我的主亞伯拉罕的上帝——耶和華；因為伊導我行抵好的路，互我得著我的主的小弟的查某孫來互伊的子。49 今恁若欲用慈愛誠實款待我的主人，就給我講；若唔亦給我講，互我好通向左，抑是向右。』58 就叫利百加來，問伊講：「你欲及此人去嗎？」伊講：「我欲去。」59 in就差小妹利百加及伊的奶母，及亞伯拉罕的奴僕，以及隨伊的人去。60 in就給利百加祝福對伊講：阮小妹啊，願你做千萬人的老母！願你的後裔得著對敵的關隘！61 利百加及伊的女婢起來，騎駱駝，隨彼個人，奴僕就導利百加去。62 以撒倚起佇南地，彼時，對庇耳拉海萊的路來。63 日欲暗，以撒出來佇田裡，靜靜想想，抬目一下看，看見駱駝來。64 利百加看見以撒，就對駱駝落來，65 問彼個奴僕講：「佇田裡行來迎接咱者的是是誰？」奴僕講：「是我的主人。」利百加就提帕家己罩。66 奴僕將所做一切的事給以撒講。67 以撒就牽利百加入伊的老母撒拉的布棚，娶伊做某，閣真疼伊。以撒對老母死後，到此霎才得著安慰。

共同經課 - 2

詩篇四十五篇十節~十七節

10 查某囡仔啊，你著聽，著看，著俯耳孔！唔通記得你的百姓及你的老父的家，11 王就欲欣慕你的媛；因為伊是你的主，你著拜伊。12 推羅的百姓欲來送禮物；百姓中的好額人欲對你求恩。13 王的查某子佇王宮內極其榮華；伊的衣服是用金線繡的。14 伊欲穿繡花的衣服，受導到王的面前；做伴跟隨伊的在室女亦欲受導到你的面前。15 in欲歡喜快樂受引導；in欲進入王宮。16 你的子孫欲續接你的列祖；你欲設立in佇全地做王。17 我欲互你的名萬代互人記念，所以萬百姓欲永永遠遠感謝你。

or 詩篇七十二篇

1 [所羅門的詩。] 上帝啊，求你將你的判斷賞賜王，將你的公義賞賜王的子。2 伊欲照公義審判你的百姓，照公平判斷你許個困苦的人。3 大山欲因為公義互百姓平安，山仔也欲按呢。4 伊欲給百姓中困苦的人判斷，伊欲救喪鄉的人，伊欲壓碎暴虐的人。5 人欲敬畏你，日久月長，直到萬世代！6 伊欲降臨，親像雨落佇已經割的草，親像及時的雨潤澤土地。7 佇伊的日子，義人欲興旺，大大平安，及月平久。8 伊欲掌權，對此個海到彼個海，對大河到地極。9 倚起佇曠野的，欲跪拜佇伊的面前；伊的對敵欲舐土粉。10 他施及海嶼的列王欲進貢；示巴及西巴的王欲獻禮物。11 列王攏欲仆落拜伊；萬國攏欲服事伊。12 因為，喪鄉人求叫的時，伊欲救伊；困苦無依倚的人，伊也欲救。13 伊欲憐憫清淡喪鄉的人，伊欲拯救喪鄉人的生命。14 伊欲救贖in的生命脫離壓迫及暴虐；伊欲看in的血做寶貝。15 伊欲活啲。欲將示巴的金互伊；欲常常為伊祈禱，通日謳佬伊。16 佇地裡佇山頂，五穀的確茂盛；所結的五穀欲搖動，親像黎巴嫩的樹；城內的人欲興旺，親像地上的草。17 伊的名欲留到永遠，伊的名欲流傳親像日的久。人欲因為伊來得著福氣；萬國欲稱呼伊有福氣。18 耶和華上帝——就是以色列的上帝，只有伊行奇異的事，應該謳佬伊！19 願伊榮光的名，永遠受謳佬。願伊的榮光充滿全地！阿們！閣阿們！20 耶西的子——大衛的祈禱明白。

共同經課 - 3

羅馬書七章十五節~二十五 a 節

15 因為我所做的，家己唔知；因為我所行的，唔是我所意愛；反轉我所怨的，我去行伊。16 今我若行所唔愛的，我就是承認律法做好。17 按呢行伊的，今唔是我，是惦佇我心內的罪惡。18 因為我知我內面，就是我肉體內，無好佇啲。因為，論彼個意愛我就有，行彼個好我就無。19 因為，我所意愛的好，我無去行；我所唔愛的歹，反轉去行。20 獨獨我若行我所唔愛的，彼個行的，今唔是我，是惦佇我內面的罪惡。21 按呢我得知有一個法，就是當我愛行好的時，歹及我佇啲。22 因為我照內心，是歡喜上帝的律法；23 若是我看百體中有別個法及我心志的法相交戰，掠我來降服百體內罪惡的法。24 苦啊！我的做人！是誰欲救我脫出此個致到死的體啊？25 感謝上帝是對咱的主耶穌基督。

共同經課 - 4

馬太福音十一章十六節~十九節, 二十五節~三十節

16 此世代我欲用甚麼來比並伊？是親像囡仔坐佇街市裡，來叫in的同伴，講：17 阮對恁歎笛仔，恁無跳舞；阮曾悲哀，恁無搥胸。18 因為約翰來，無食無飲，人就講伊患著鬼；19 人子來，亦食亦飲，人就講伊是貪食好酒的人，抽餉及歹人的朋友。若是智慧對伊的所行顯明伊是著。」25 當彼時，耶穌應講：「父啊，天地的主，我謳佬你！因為你將諸個事對智慧聰明的有隱密伊，對細子有顯明伊。26 父啊，是啦，因為你看按呢做歡喜。27 萬項有，對我的父交付我；父以外，無一個識子；子及子所愛欲指示的以外，無一個識父。28 恁見若著磨擔重擔的著就近我，我欲互恁安息。29 我心內溫柔謙遜，恁背我的軛，來對我學；就恁的心神會得著安息。30 因為我的軛是快，我的擔是輕。」